

共同經課-1 使徒行傳四章五節～十二節

5 隔日，in ê 官府、長老、經學士聚集 tī 耶路撒冷；6 祭司頭 A-ná tī-teh，koh 有 Kai-a-hoat、約翰、亞力山大，以及凡若屬祭司頭 ê 宗族亦 tī-teh。7 hō in khiā tī 中央，問講，lín 用甚麼權能，用甚麼名，行 chit-ê t'ai-chi ah？8 彼得 hit 時 hō 聖神充滿，對 in 講，9 百姓 ê 官府，kap 長老 ah，阮 chiah-ê 今 á 日若為 tiòh 行 tī 軟弱 ê 人 ê 好事來受審問，看伊 àn 怎樣得救；10 就 lín 眾人，kap thong 以色列百姓 tiòh 知，是 tī 拿撒勒人耶穌基督 ê 名，lín 所釘 tī 十字架，上帝 hō 伊 tùi 死人中 koh 活 ê，就是 tī 伊 ê 名，chit 人好好 khiā tī lín ê 面前。11 伊就是 lín 師傅所 m̄-tih ê 石，已經成做厝角 ê 頭。12 Koh tī 別 ê 並無拯救；因為 tī 天下，無賞賜別個名 tī 人 ê 中間，hō 咱 tiàm-tī 伊來得救。

共同經課-2 詩篇二十三篇

1 大衛 ê 詩。1) 耶和華是我 ê 牧者，我無欠缺。2 伊 hō 我倒 tī 青翠 ê 草埔；Chhoā 我 tī 安靜 ê 水邊。3 伊 hō 我 ê 靈魂精英；為 tiòh 伊 ê 名，chhoā 我行義 ê 路。4 我雖然行過死蔭 ê 山谷，亦 m̄ 驚災害；因為你 kap 我 tī-teh；你 ê thui，你 ê 柺，安慰我。5 Tī 我對敵 ê 面前，你 kā 我排設筵席；你用油抹我 ê 頭殼；我 ê 杯滿出來。6 恩典 kap 慈悲的確 tè 我到一世人；我 beh 永遠 khiā 起 tī 耶和華 ê 厝。

共同經課-3 約翰壹書三章十六節～二十四節

16 伊替咱獻伊 ê 性命，咱 tùi chit-ê bat 仁愛；咱也應該替兄弟獻性命。17 人若有世間 ê 財產，看見伊 ê 兄弟欠缺，也無開伊 ê 慈心，上帝 ê 疼 thái-thó 有 tiàm tī 伊 ah？18 細 kiáⁿ ah，咱 ê 相疼 m̄-thang 用話，用舌；是 tiòh 用行，用誠實。19 Tùi án-ni 咱 beh 知咱是出 tī 真實，見若心有所責備咱，beh 安慰咱 ê 心 tī 伊 ê 面前；20 因為上帝比咱 ê 心 khah 大，也無所 m̄ 知。21 所疼 ê 兄弟 ah，心若無責備咱，就咱 òng 上帝有好膽；22 koh 見若咱所求 ê，就 tùi 伊得 tiòh，因為咱守伊 ê 命令，tī 伊 ê 面前行伊所歡喜 ê t'ai-chi。23 也伊 ê 命令是 án-ni，就是咱信伊 ê Kiáⁿ 耶穌基督 ê 名，koh 大家相疼，照伊所 hō 咱 ê 命令。24 守伊 ê 命令 ê 人就 tiàm tī 伊，伊也 tiàm tī 伊。咱 tùi án-ni 知伊 tiàm tī 咱，是 tùi 伊所 hō 咱 ê 神。

共同經課-4 約翰福音十章十一節～十八節

11 我就是好 ê 牧者；好 ê 牧者為 tiòh 羊放 sak 性命。12 做倩工 ê，m̄ 是做牧者，羊也 m̄ 是伊家已 ê 羊；看見豺狼來，放 sak 羊就逃走，豺狼咬 in，趕散 in；13 這是因為伊做倩工，無關心 tī 羊。14 我是好 ê 牧者；我 bat hiah-ê 屬我 ê，屬我 ê 亦 bat 我。15 親像父 bat 我，我 bat 父一樣；koh 我為 tiòh 羊放 sak 性命。16 我 iáu 有羊，m̄ 是屬 chit-tiâu ê；我的確 tiòh chhoā in 來，in 亦 beh 聽我 ê 聲；koh beh 成做一群，歸一個牧者。17 所以父疼我，因為我放 sak 我 ê 性命，thang koh 復到伊。18 無人 tùi 我取伊，是我家已放 sak 伊。我有權 thang 放 sak，亦有權 thang 復到。這是我 tùi 我 ê 父所受 ê 命令。